

Zeitschrift: Igl Ischi : organ della Romania (Societat de Students Romontschs)

Herausgeber: Romania (Societat de Students Romontschs)

Band: 79 (1997)

Heft: 6

Artikel: Uestg Dominicus Willi, O. Cist., Domat/Limburg

Autor: Haas, Theo

DOI: <https://doi.org/10.5169/seals-881669>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 30.07.2025

ETH-Bibliothek Zürich, E-Periodica, <https://www.e-periodica.ch>


Uestg Dominicus Willi, O. Cist., Domat/Limburg

Denter ils quater uestgs che Domat ha giu duront ils davos tschentaners ei probabel la carriera e la veta da Dominicus Willi stada ina dallas pli interessantas enteifer ils umens che Domat ha dau alla baselgia.

Derivonza

Nies uestg ei naschius ils 20 d'avrel 1844 sco tschunavel affon dad Onna Bieler e Ginard Antuné Willi. El vegn battegiaus sil num Marté Carlé. Il bab occupava da gliez temps il post dad in sergeant a Cuera che veva da recrutar schuldada pil tierz regiment svizzer dil retg da Napel. Pli tard serenda il bab sez alla cuort dil retg da Napel, separticipescha 1848/49 dalla campagna en Sicilia e tuorna 1853 - ornaus cun differentas distincziuns - sco premlitinent a casa. Leu surpren el differents uffecis e daventa president da vischnaunca. Dasperas fageva la famiglia Willi il pur, quei che lubeva da nutrir la famiglia che carscheva ad in crescher. La mumma dil giuven Marté Carlé miera gia 1857 ella vegliadetgna da strusch 53 onns. Sco ei vegn detg fubi ella carezada e stimada egl entir vitg muort sia buontad e beinvulentscha. Dad ella arta il buobet bein quellas habilitads che caracteriseschan el pli tard. La mort prematura da sia zun carezada mumma sto esser stada ina greva frida pil giuvenot. Il bab Ginard Antuné (vulgo Naté Tuné) marida 1859 per la secunda gada. Ensemen cun Mariurschla Casantieri da Razén ha el giu ulteriurs treis affons. Mo era la secunda dunna miera gia 1865. Igl onn 1867 marida el per la tiarza gada. La giuvna Onnamareia Canetg da Castrisch ei buca meins che 37 onns pli giuvna che el. Ella parturescha nov gadas. Cu la davosa feglia nescha ha il bab gia vargau ils otgonta. Ginard Antuné miera 1889 cun 86 onns e lai anavos ina famiglia numerusa e per part fetg giuvna. Sia davosa dunna che vegneva numnada a Domat „La Castrischa“ miera 1935 ella vegliadetgna da 95 onns. Da sias treis

dunnas duei el ina gada haver detg: „L'emprema ei stada in aunghel,
la secunda in carstgaun e la tiarza in giavel!“



Casa paterna avon igl incendi dils 3.9.1903, dretg. (Fontauna: museum svizzer dalla PTT, Berna.)

Scolaziun e studis

Las empremas classas dalla scola primara fa el en sia vischnaunca. Pli tard tarmettan ils geniturs il buobet a Cuera tier parents. Ella scola dalla Cuort ha el lu la pusseivladad dad emprender da rudien tudestg. Igl atun 1855 entra il premurau giuven ella scola claustralda da Nossadunnaun. Denter ses scolasts che sespruavan buca mo da scolar igl entelletg, mobein era il cor, sesanflava da lezzas uras era il pader Martin Marty da Sviz che miera 1896 sco missiunari dils Indians ed uestg da St.Cloud ell'America. Suenter ils studis gimnasials sedecida il talentau Marté Carlé da dedicar sias forzas al survetsch dil Segner.

Ella claustra da Mehrerau/Austria

Igl atun 1861 splunta el vid la porta dalla claustra cisterciensa da Mehrerau nua ch'el vegn retscharts cun mauns aviarts sco noviz. Ils 13 da november 1862 fa el professiun sco frater Dominicus. Ei suondan studis dalla ascesa. Naven da 1863 tochen 65 eis el puspei a Nossadunnaun, nua ch'el studegia filosofia e teologia. La primavera 1867 - pia glia cun 23 onns - retscheiva Dominicus la ordinaziun sco pader cisterciens.




Il giuven Dominicus sco pader a Mehrerau (A)

Prefect e rectur dil collegi da S.Bernard

La claustra menava e meina aunc oz in gimnasi cul internat „Collegi da S. Bernard“. Igl avat Martin Reimann ha gleiti realisau ch'il giuven pader Dominicus haveva tut las habilitads per numnar el prefect da quei collegi, ina funcziun che Willi exequescha naven da 1867 tochen 1875. Lu daventa el rectur dalla scola e 1878 priur. Cunquei occupava Willi ussa dus dils posts ils pli impurtonts che la claustra veva da surdar. Sper sias enconuschientschas profundas era nies pader romontsch in meister en la educaziun ed instrucziun da ses scolars. El capeva oreifer da scaffir in clima da confidanza denter scolars, geniturs e scolasts. Aunc biars onns suenter turnavan magari scolars ni geniturs



La claustra da Mehrerau (A) alla fin dil davos tschentaner



La claustra da Mehrerau (A) oz

tier pader Willi per in cussegl. Ei fa pia bein buca surstar che il diember da scolars fuva pli che dublegiaus duront siu temps da prefect! Sut Willi era il collegi daventau la luschezia da Mehrerau.


La fin dil cumbat cultural

En Tiaratudestga mava il cumbat cultural denter il stadi e la baselgia catolica a fin. Il cancelier digl imperi tudestg, cont Otto von Bismarck, sespruava tras contractivas cul Vatican da s'arranschar cun la baselgia e cugl episcopat tudestg. El veva stuiu acceptar ch'el veva piars siu cumbat encunter la baselgia catolica. Il moviment catolic, representaus tras la partida dil centrum, era pli fermi ed unius che mai. Il cumbat cultural ei vegnius finius entras las leschas da pasch da 1880 e 1887. Differents uordens entscheivan ussa a fundar claustras novas en Germania ni a colonisar existentas ch'els vevan stuiu bandunar.


Refundaziun dalla abbazia da Marienstatt

Gia igl onn 1803 era la claustra cisterciensa da Marienstatt en Hessen-Nassau vognida serrada entras la secularisaziun. Bein veva ina congregaziun da paders dau nova veta al convent e drizzau en leu 1864 in institut per giuvens. Ina ordinaziun guvernamentalha denton scatschau els da mesa stad 1873. Per buca piarder tut veva la diocesa da Limburg cumprau la claustra igl atun 1873 e cheutras silmeins saviu mantener leu igl institut.

Il di da S. Giusep 1887 entaupa igl avat da Mehrerau, pader Maurus Kalkum(1836; 1878-1893), il plevon Franz Witgert dalla diocesa da Limburg. Quel enconuscheva Marienstatt da pli baul. Ussa fagevan



L'abbazia da Marienstatt (D) 1894



L'abbazia da Marienstatt (D) oz

omisdus ina cura da Kneipp a Bad Wörishofen. Il plevon roga igl avat da far tut siu pusseivel per reactivar la veta claustral a Marienstatt. Avat Kalkum, il cunnoviz e bien amitg da pader Willi, ei incantaus da quella idea. El tuorna en sia claustra alla riva dil lag da Constanza ed informescha pader Dominicus. Naven dall'entschatta eis ei clar agl avat che mo nies pader romontsch vegni en damonda per surprender ina tala scharscha. Ussa entscheiva ina liunga via tras instanzas ecclesiasticas e statalas tochen a Ruma e Berlin. Finalmein eis ei aschi lunsch. Ils 30 d'uost 1888 ei la fiasta ufficiala dalla reavertura della claustra da Marienstatt. Priur Dominicus Willi, ussa superiur, entra aunc cun tschun paders e dus fraters da Mehrerau en quella claustra che semeglia pli ina ruina ch'in complex religius bein mantenui.

„Igl avat culs egliers d'argien ed il cor dad aur“

Aschia vegneva avat Willi numnaus da quels che enconuschevan el. Entras sia demanonza mudesta e siu agir prudent gudogna il priur ed

administratur oriunds dallas muntognas grischunas spert ina gronda simpatia tier la populaziun e tier las autoritads ecclesiasticas e politicas.

Ei fa pia buca surstar che Dominicus Willi vegn - sin proposta digl uestg dr. Karl Klein da Limburg - elegius ed installaus sco avat ils 8 da matg 1890 a Marienstatt. Igl 1. da december 1890 sa avat Dominicus gia nudar in effectiv da 23 commembers da siu uorden. En



Willi sco avat nievelegiu da Marienstatt (D) 1890

cuort temps saveva la claustra selegrar dad esser daventada il center per ils spirituals digl entir contuorn, appartenent allas diocesas da Limburg, Cologna, Paderborn e Trier ed era il diember da scolars carscheva onn per onn. Sco motto en siu uoppen veva il nievelegiu giavischau ils plaids PATIENTIA ET CONSTANTIA (pazienzia e constanza/statteivladad), plaids che corrispundevan fetg bein a siu caracter.

Il pader perscrutader

Pader Dominicus ei da giuven ensi era staus igl um dalla perscrutaziun. Da sia plema ein sorti studis extendi e numerus artechels che s'occupavan surtut dalla historia dalla congregaziun dils Cisterciens. El nudava tut ils eveniments e schabetgs en ses diaris e menava ina correspondenza voluminusa cun ses superiurs. Oz fuorma quei relasch ina fontauna fetg impurtonta per historiografs e biografs.

1876 descriva el en in fetg interessant manuscret entitulaus: „Domat sper Cuera - regurdientschas alla patria“ il vitg, la glieud, la veta religiosa e profana, ils usits, las baselgias e capluttas da sia vischnaunca.

Willi daventa uestg da Limburg

Ils 6 da fevrer 1898 miera a Limburg uestg dr. Klein, in um che era seprofilaus entras sia savida, energia e prudentscha. Tgi eleger sco successur? Il capetel catedral veva inoltrau ina gliesta da candidats alla regenza prussiana. Lezza veva - sco consequenza tardiva dils embrugls duront il cumbat cultural - strihau tut ils „ultramontans“ e critichers dil stadi. Sco personalitads profiladas restavan aschia mo il prevost dil capetel Gieri Hilpisch e Dominicus Willi. La decisiun croda ils 15 da zercladur en favur da Willi. Il fatg ch'in Svizzer daventa uestg dad ina diocesa tudestga ei singulars e demuossa l'auta stema e gronda confidonza enviers sia persuna. Ils 11 da fenadur 1898 retscheiva el dall'academia da Münster il docter d'honur en teologia.

Igl avat da Marienstatt gudeva sco persuna buntadeivla, pascheivla e cooperativa in'aulta stema tier tuts e valeva era sco ina persuna dalla integraziun. Quellas qualitads da caracter ein la finala bein stadas decisivas per sia elecziun. Willi, fetg surstaus da sia elecziun, ha buca giu lev da bandunar si'abbazia e se render alla sedia episcopala a Limburg. Ils 8 da settember vegn el ordinaus uestg el dom da Limburg.

Il schaner 1899 vegn el envidaus digl imperatur ad ina audienza a Berlin e solva leu cun Guglielm II. Duas gadas vegn nies uestg distinguius dil suveran cun surdar igl uorden. Uestg Dominicus ei staus cavalier digl uorden tgietschen dalla evla prussiana da 2. classa e digl uorden dalla cruna da 2. classa.



Dominicus Willi sco uestg da Limburg (D)

Stretgs ligioms cun la patria e cul romontsch

Willi ha adina puspei visitau sia patria, alla quala el era zun attaschau. Silmeins duas gadas eis el era vegnius a Domat sco uestg (1899 e 1905) quei che vegneva mintgamai annunziau el „Bündner Tagblatt“.

Schegie ch'el ha adina luvrau lunsch naven dalla tiara romontscha, ha el tonaton buca emblidau sia viarva materna. El era in fideivel lectur dalla „Gasetta Romontscha“ e digl „Ischi“. Ils 12 da settember 1902 scriva uestg Willi al redactur digl „Ischi“, dr. Caspar Decurtins, en ina brev denter auter il suandont: „Cun grond plascher hai jeu avon plirs onns udiu tras la 'Gasetta Romontscha' della fundaziun della Romania,

la quala ha l'intenziun de mantener il lungatg matern; ed era suenter cun buca pign interess legiu ils referats sur las redunonzas annualas della Societad. Jeu beneventeschel il bein motivau program e giavischel da cor alla Societad in prosperiu progress. Cun pintga breigia e grond success emprendan ils Grischuns ils lungatgs jasters. Possien els cun la medema fervur era retener, cultivar e promover il lungatg, il qual els han empriu da lur mummas ed il qual els han duvrau per exprimer ils emprems plaids de lur veta. Cun plischer acceptel jeu il tetel de commember honorari della Romania.“ Cun quella brev ha monsignur Willi aunc uniu in bi regal per mauns dalla Romania, in regal dad in generus pardrin a sia figliola. Cun quel eis ei vegniu repartiu gratuitamein „Ischis“ alla giuventetgna romontscha.

In operar fritgeivel

Uestg Willi ha duront siu pontificat da biebein 14 onns prestau bia. El miera ils 6 da schaner 1913 suenter ch'el era vegnius surprius dad ina fleivlezia dil cor in pèr meins avon duront ils exercezis ella claustra da Seistingen.

Il capetel catedral ha resumau siu operar diocesan en paucs plaids sco suonda: „Pli che 100'000 affons ha el cresmau, pli che 200 prers ha el ordinau, datier da 40 baselgias consecrau, dau ferm impuls alla veta religiusa, promoviu filialas impurtontas dad uordens sco quella dils caputschins a Frankfurt, dils franciscans a Kelkheim, dallas soras benedictinas a Eibingen e dallas muniessas benedictinas dalla aduraziun eterna a Niederlahnstein, e baghegiau dus convicts a Hadamar ed a Montabaur“...e vinavon:

“En ils pli che 14 onns da lavur sco uestg ha el adina mo giu la finamira da far tut per la gloria da Diu e per il beinstar da siu uestgiu. Era sin la sedia episcopala eis el restaus il pader humiliteivel ch'el ei staus avon sco priur ed avat da Marienstatt.“

Sut monsignur Dominicus ei il diember da soras carschius en siu uestgiu dad entuorn 700 sin pli che 1400 ed uestg Willi ha saviu

migliurar considerablamein las relaziuns denter ils gremis statals e sia diocesa. 1905 ein igl imperatur Guglielm II e sia dunna sin viseta a Limburg ed il imperatur sez arva il museum diocesan niev da Limburg.

Uestg Willi ha teniu l'empermischun ch'el veva fatg cura ch'el veva ascendiu la sedia episcopala dad esser viers in e scadin in bien e migeivel bab.

Ils 9 da schaner 1913 vegn il sisavel uestg da Limburg, dr. Dominicus Willi, satraus ella cripta nova dils uestgs. Ella sava ein scalprai ils plaids suandonts: „Cheu ella tiara ei la secunda avdonza dils uestgs da Limburg. L'emprema ei stada sin tiara. La tiarza possi esser enta parvis!“

Fontaunas

- Müller G.: Der neue Bischof von Limburg, en: Cistercienser Chronik 1898.
- Müller G.: Dr. Dominicus Willi, Bischof von Limburg+, en: Cistercienser Chronik 1913.
- Spescha A.: Dr. Domeni Willi, uestg de Limburg, en: Ischi 1912.
- Anonim: Bischof Willi von Limburg, en: Basler Volksblatt 08-01-1913.
- Niderberger L.: Dr. Dominicus Willi, Bischof von Limburg, en: Die katholische Welt, mars 1913.
- Anonim: Die Bischöfe Limburgs, en: Kirchenzeitung Der Sonntag, avrel 1948.
- Differents auturs: 100 Jahre Wiederbesiedlung der Abtei Marienstatt 1888-1988, Marienstatt 1988.
- Hammer G.: 1892 -100- 1992 Kirchenchor Cäcilia Abtei Marienstatt, Marienstatt 1992.